

摛藻堂四庫全書薈要

史部

欽定四庫全書叢要

史部

宋書卷四十三



詳校官內閣侍讀吳孫球

欽定四庫全書薈要卷四千二百五

史部

宋書卷四十三

梁

沈

約

撰



傳第三

徐羨之

傅亮

檀道濟

徐羨之字宗文東海郯人也祖寧尚書吏部郎江州刺  
史未拜卒父祚之上虞令羨之少為王雅太子少傅主  
簿劉牢之鎮北功曹尚書祠部郎不拜桓修撫軍中兵

曹參軍與高祖同府深相親結義旗建高祖版為鎮軍  
參軍尚書庫部郎領軍司馬與謝混共事混甚知之補  
琅邪王大司馬參軍司徒左西屬徐州別駕從事史太  
尉咨議參軍義熙十一年除鷹揚將軍琅邪內史仍為  
大司馬從事中郎將如故高祖北伐轉太尉左司馬掌  
留任以副貳劉穆之初高祖議欲北伐朝士多諫唯羨  
之默然或問何獨不言羨之曰吾位至二品官為二十  
石志願久克今二方已平拓地萬里唯有小羌未定而

公寢食不忘意量殊乖何可輕豫劉穆之卒高祖命以  
羨之為吏部尚書建威將軍丹陽尹總知留任甲仗二  
十人出入轉尚書僕射將軍尹如故十四年大司馬府  
軍人朱興妻周坐息男道扶年三歲先得癩病周因其  
病發掘地生埋之為道扶姑女所告正周棄市刑羨之  
議曰自然之愛虎狼猶仁周之凶忿宜加顯戮臣以為  
法律之外故尚弘物之理母之即刑由子明法為子之  
道焉有自容之地雖伏法者當辜而在宥者靡容愚謂

可特申之遐裔從之高祖踐阼進號鎮軍將軍加散騎常侍上初即位思佐命之功詔曰散騎常侍尚書僕射鎮軍將軍丹陽尹徐羨之監江州豫州之西陽新蔡諸軍事撫軍將軍江州刺史華容侯王弘散騎常侍護軍將軍作唐男檀道濟中書令領太子詹事傅亮侍中中領軍謝晦前左將軍江州刺史宜陽侯檀韶使持節雖梁南北秦四州荊州之河北諸軍事後將軍雝州刺史關中侯趙倫之使持節督北徐兗青三州諸軍事征虜

將軍北徐州刺史南城男劉懷慎散騎常侍領太子左衛率新淦侯王仲德前冠軍將軍北青州刺史安南男向彌左衛將軍潯陽男劉粹使持節南蠻校尉琅山子到彥之西中郎司馬南郡宜陽侯張劭參西中郎將軍事建威將軍河東太守資中侯沈林子等或忠規遠謀扶讚洪業或肆勤樹績弘濟艱難經始圖終勲烈惟茂並宜與國同休饗茲大賚羨之可封南昌縣公弘可華容縣公道濟可改封永修縣公亮可建城縣公晦可武

昌縣公食邑各二千戶韶可更增邑二千五百戶仲德  
可增邑二千二百戶懷慎彥之各進爵為侯粹改封建  
安縣侯竝增邑為千戶倫之可封霄城縣侯食邑千戶  
劭可封臨沮縣伯林子可封漢壽縣伯食邑六百戶開  
國之制率遵舊章羨之遷尚書令揚州刺史加散騎常  
侍進位司空錄尚書事常侍刺史如故羨之起自布衣  
又無術學直以志力局度一旦居廊廟朝野推服咸謂  
有宰臣之望沈密寡言不以憂喜見色頗工奕棋觀戲

常若未解當世倍以此推之傅亮蔡廓常言徐公曉萬  
事安異同高祖不豫加班歛三十人宮車晏駕與中書  
令傅亮領軍將軍謝晦鎮北將軍檀道濟同被顧命少  
帝詔曰平理獄訟政道所先朕哀荒在疚未堪親覽司  
空尚書令可率衆官月一決獄帝後失德羨之等將謀  
廢立而廬陵王義真輕動多過不任四海乃先廢義真  
然後廢帝時謝晦為領軍以府舍內屋敗應治悉移家  
人出宅聚將士於府內鎮北將軍南兗州刺史檀道濟

先朝舊將威服殿省且有兵衆召使入朝告之以謀事  
將發道濟入宿領軍府中書舍人邢安泰潘盛為內應  
其日守關道濟領兵居前羨之等繼其後由東掖門雲  
龍門入宿衛先受處分真有動者先是帝於華林園為  
列肆親自酤賣又開瀆聚土以像破崗率左右唱呼引  
船為樂是夕寢於龍舟在天淵池兵士進殺二人又傷  
帝指扶帝出東閣收璽綬群臣拜辭衛送故太子宮遷  
於吳郡侍中程道惠勸立第五皇弟義恭羨之不許遣

使殺義真於新安殺帝於吳縣時為帝築宮未成權居  
金昌亭帝突走出昌門追者以門闌擊之倒地然後加  
害太祖即阼進羨之司徒餘如故改封南平郡公食邑  
四千戶固讓加封有司奏車駕依舊臨華林園聽訟詔  
曰政刑多所未悉可如先二公推訊元嘉二年羨之與  
左光祿大夫傅亮上表歸政曰臣聞元首司契運樞成  
務臣道代終事盡宣翼冕旒之道理絕於上皇拱已之  
事不行於中古故高宗不言以三齡為斷冢宰聽政以

再朞為節百王以降罔或不然陛下聖德紹興負荷洪業億兆顥顥思陶盛化而聖旨謙挹委成群司自大禮告終鑽燧三改大明佇照遠邇傾屬臣等雖率誠屢聞未能仰感敢藉品物之情謹因蒼生之志伏願陛下遠存周文日昃之道近思皇室締構之艱時攬萬機躬親朝政廣開四聰博詢庶業則雍熙可臻有生幸甚上未許羨之等重奏曰近寫下情言為心罄奉被還詔鑒許未回豈惟愚臣秉心有在詢之朝野人無異議何者形

風四方寔繫王德一國之事本之一人雖世代不同時  
殊風異至於主運臣贊古今一揆未有渾心委任而休  
明可期此之非宣布自遐邇臣等荷遇二世休慼以均  
情為國至豈容順默重披丹心冒昧以請上猶辭羨之  
等又固陳曰比表披陳辭誠俱盡詔旨冲遠未垂聽納  
三復屏營伏增憂歎臣聞克隆先構幹蠱之盛業昧旦  
丕顯帝王之高義自皇宋創運英聖有造殷憂未闕艱  
患仍纏賴天命有底聖明承業時屯國故猶在民心太

山之安未易可保胥明隆替繫在聖躬斯誠周詩夙興  
之辰殷王待旦之日宜得無為拱已復玄古之風逡巡  
虛挹徇匹夫之事伏願以宗廟為重百姓為心弘大業  
以嗣先軌隆聖道以增前烈愚瞽所獻情盡於此上乃  
許之羨之仍遜位退還私第兄子佩之及侍中程道惠  
吳興太守王韶之等竝謂非宜敦勸甚苦復奉詔攝任  
三年正月詔曰民生於三事之如一愛敬同極豈惟名  
教况乃施侔造物義在加隆者乎徐羨之傳亮謝晦皆

因緣之才荷恩在昔擢自無聞超居要重卵翼而長未  
足以譬永初之季天禍橫流大明傾曜四海遏密實受  
顧託任同負圖而不能竭其股肱盡其心力送往無復  
言之節事居闕忠貞之効將順靡記匡救蔑聞懷寵取  
容順成失德雖末因懼禍以建大策而逞其悖心不畏  
不義播遷之始謀肆酖酖毒至止未幾顯行怨殺窮凶極  
虐荼酷備加顛沛皂隸之手告盡逆旅之館都鄙哀愕  
行路飲涕故廬陵王英秀明遠徽風夙播魯衛之寄朝

野屬情羨之等暴蔑求專忌賢畏逼造構貝錦成此無  
端罔主蒙上橫加流屏矯誣朝旨致茲禍害寄以國命  
而翦為仇讎旬月之間再肆酖毒感痛三靈怨結人鬼  
自書契以來棄常安忍反易天明未有如斯之甚者也  
昔子家從弑鄭人致討宋肥無辜蕩澤為戮况逆亂倍  
於往釁情痛深於國家此而可容孰不可忍即宜誅殛  
告謝存亡而于時大事甫爾異同紛結匡國之勲實著  
莫大之罪未彰是以遠酌民心近聽輿訟雖欲討亂慮

或難圖故忍戚含哀懷恥累載每念人生實難情事未  
展何嘗不顧影慟心伏枕泣血今逆臣之釁彰暴遐邇  
君子悲情義徒思奮家讎國耻可得而雪便命司寇肅  
明典刑晦據有上流或不即罪朕當親率六師為其遏  
防可遣中領軍到彥之即日電發征北將軍檀道濟絡  
驛繼路符衛軍府州以時收翦已命征虜將軍劉粹斷  
其走伏罪止元凶餘無所問感惟永往心情崩絕氣霧  
既祛庶幾治道爾且詔召羨之行至西明門外時謝晦

弟囉子肖為黃門郎正直報亮云殿內有異處分亮馳  
報羨之羨之回還西州乘內人問訊車出郭步走至新

林入陶竈中自剄死時年六十三羨之初不應召上遣  
中領軍到彥之右衛將軍王華追討羨之死野人以告  
載尸付廷尉子喬之尚高祖第六女富陽公主官至竟  
陵王文學喬之及弟乞奴從誅初羨之年少時嘗有一  
人來謂之曰我是汝祖羨之因起拜之此人曰汝有貴  
相而有大厄可以錢二十八文鍾宅四角可以免灾過

此可位極人臣後羨之隨親之縣住在縣內嘗暫出而賊自後破縣縣內人無免者雞犬亦盡唯羨之在外獲全隨從兄履之為臨海樂安縣嘗行經山中見黑龍長丈餘頭有角前兩足皆具無後足曳尾而行及拜司空守闕將入彗星晨見危南又當拜時雙鶴集太極東鶴尾鳴喚兒子佩之輕薄好利高祖以其姻戚累加寵任為丹陽尹吳郡太守景平初以羨之秉權頗豫政事與王韶之程道惠中書舍人邢安泰潘盛相結黨與時謝

晦久病連炎不堪見客佩之等疑其託疾有異圖與韶  
之道惠同載詣傳亮稱羨之意欲令亮作詔誅之亮答  
以為已等三人同受顧命豈可相殘戮若諸君果行此  
事便當角巾步出掖門耳佩之等乃止羨之既誅太祖  
特宥佩之免官而已其年冬佩之又結殿中監茅亨謀  
反并告前寧州刺史應襲以亨為兗州襲為豫州亨密  
以聞襲亦告司徒王弘佩之聚黨百餘人殺牛犒賜條  
牒時人竝相署置期明年正會於殿中作亂未及數日

收斬之

傅亮字季友北地靈州人也祖咸司隸校尉父瑗以學業知名位至安成太守瑗與郗超善超嘗造瑗瑗見其二子廸及亮亮年四五歲超令人解亮衣使左右持去初無吝色超謂瑗曰卿小兒才名位宦當遠踰於兄然保家傳祚終在大者廸字長猷亦儒學官至五兵尚書永初二年卒追贈太常亮博涉經史尤善文詞初為建威參軍桓謙中軍行參軍桓玄篡位聞其博學有文采

選為秘書郎欲令整正秘閣未及拜而玄敗義旗初丹  
陽尹孟昶以為建威參軍義熙元年除員外散騎侍郎  
直西省典掌詔命轉領軍長史以中書郎滕演代之亮  
未拜遭母憂服闋為劉毅撫軍記室參軍又補領軍司  
馬七年遷散騎侍郎復代演直西省仍轉中書黃門侍  
郎直西省如故高祖以其久直勤勞欲以為東陽郡先  
以語廸廸大喜告亮亮不答即馳見高祖曰伏聞恩旨  
賜擬東陽家貧忝祿私計為幸但憑廕之願實結本心

乞歸天宇不樂外出高祖笑曰謂卿之須祿耳若能如此甚協所望會西討司馬休之以為太尉從事中郎掌記室以太尉參軍羊徽為中書郎代直西省亮從征關洛還至彭城宋國初建令書除侍中領世子中庶子徙中書令領中庶子如故從還壽陽高祖有受禪意而難於發言乃集朝臣燕飲從容言曰桓玄暴篡鼎命已移我首唱大義復興皇室南征北伐平定四海功成業著遂荷九錫今年將衰暮崇極如此物戒盛滿非可久安

今欲奉還爵位歸老京師群臣唯盛稱功德莫曉此意日晚坐散亮還外乃悟旨而宮門已閉亮於是叩扉請見高祖即開門見之亮入便曰臣暫宜還都高祖連解此意無復他言直云須幾人自送亮曰須數十人便足於是即便奉辭亮既出已夜見長星竟天亮拊髀曰我常不信天文今始驗矣至都即徵高祖入輔永初元年遷太子詹事中書令如故以佐命功封建城縣公食邑二千戶入直中書省專典詔命以亮任總國權聽於省

見客神虎門外每旦車常數百兩高祖登庸之始文筆  
皆是記室參軍滕演北征廣固悉委長史王誕自此後  
至于受命表策文誥皆亮辭也演字彥將南陽西鄂人  
官至黃門郎祕書監義熙八年卒二年亮轉尚書僕射  
中書令詹事如故明年高祖不豫與徐羨之謝晦竝受  
顧命給班斂二十人少帝即位進為中書監尚書令景  
平二年領護軍將軍少帝廢亮率行臺至江陵奉迎太  
祖既至立行門於江陵城南題曰大司馬門率行臺百

僚請門拜表威儀禮容甚盛太祖將下引見亮哭慟甚哀動左右既而問義真及少帝薨廢本末悲號嗚咽侍側者莫能仰視亮流汗沾背不能答於是布腹心於到彥之王華等深自結納太祖登阼加散騎常侍左光祿大夫開府儀同三司本官悉如故司空府文武即為左光祿府又進爵始興郡公食邑四千戶固讓進封元嘉三年太祖欲誅亮先呼入見省內密有報之者亮辭以嫂病篤求暫還家遣信報徐羨之因乘車出郭門騎馬

奔趨廸墓屯騎校尉郭泓收付廷尉伏誅時年五十三  
初至廣莫門上遣中書舍人以詔書示亮并謂曰以公  
江陵之誠當使諸子無恙初亮見世路屯險著論名曰  
演慎曰大道有言慎終如始則無敗事矣易曰括囊無  
咎慎不害也又曰藉之用茅何咎之有慎之至也文王  
小心大雅詠其多福仲由好勇馮河貽其苦箴虞書著  
慎身之譽周廟銘陞坐之側因斯以談所以保身全德  
其莫尚於慎乎夫四道好謙三才忌滿祥萃虛室鬼瞰

高屋豐屋有蔀家之灾鼎食無百年之貴然而徇欲厚  
生者忽而不戒知進忘退者曾莫之懲前車已摧後鑾  
不息乘危以庶安行險而徼幸於是乎顛墜覆亡之禍  
殘生天命之釁其故何哉流溺忘反而以身輕於物也  
故昔之君子同名爵於香餌故傾危不及思憂患而豫  
防則鍼石無用洪流壘於渭渭合拱挫於纖蘖介焉是  
式色斯而舉悟高鳥以風逝鑑醴酒而投絞夫豈敝著  
而後謀通患結而後思復云爾而已哉故詩曰慎爾侯

度用戒不虞言防萌也夫單以營內喪表張以治外失  
中齊秦有守一之敗偏恃無兼濟之功冰炭滌於胃心  
巖牆絕於四體夫然故形神偕全表裏寧一營魄內澄  
百骸外固邪氣不能襲憂患不能及然何以語至而言  
極矣夫以嵇子之抗心希古絕羈獨放五難之根既拔  
立生之道無累人患殆乎盡矣徒以忽防於鍾呂肆言  
於禹湯禍機發於豪端逸翩鍛於衆舉觀夫貽書良友  
則匹厚味於甘耽闕八字

其懼患也若無

轡而乘奔其慎禍也猶履冰而臨谷或振褐高樓揭竿  
獨往或保約違豐安于卑位故漆園外楚忌在龜犧商  
洛遐遯畏此駟馬平仲辭邑殷鑒於崔慶張臨挹滿灼  
戒乎桑霍若君子覽茲二塗則賢鄙之分既明全喪之  
實又顯非知之難慎之惟難慎也者言行之樞管乎夫  
據圖揮刃愚夫弗為臨淵登峭莫不懦慄何則害交故  
慮篤患切而懼深故詩曰不敢暴虎不敢馮河慎微之  
謂也故庖子涉族怵然為戒差之一毫弊猶如此况乎

觸害犯機自投死地禍福之具內克外斥陵九折於邛  
僰泛衝波於呂梁傾側成於俄頃性命哀而莫救嗚呼  
嗚呼故語有之曰誠能慎之福之根也曰是何傷禍之  
門爾言慎而已矣亮布衣儒生侥幸際會既居宰輔兼  
總重權少帝失德內懷憂懼作感物賦以寄意焉其辭  
曰余以暮秋之月述職內禁夜清務隙遊目藝苑于時  
風霜初戒蟬類尚繁飛蛾翔羽翩翩滿室赴軒幌集明  
燭者必以樵滅為度雖則微物矜懷者久之退感莊生

異鶻之事與彼同迷而忘反鑒之道此先師所以鄙智及齊客所以難日論也悵然有懷感物興思遂賦之云爾在西成之暮晷肅皇命於禁中聆蜻蛚於前廡鑒朗月於房櫳風蕭瑟以陵幌霜皚皚而被墉怜鳴蜩之應節惜落景之懷東嗟勞人之萃感何夕永而慮克眇今古以遐念若循環之無終詠倚相之遺矩希董生之方融鑽光燈而散袞溫聖哲之遺蹤墳素杳以難暨九流紛其異封領三百於無邪貫五千於有宗考舊聞於前

史訪心跡於汎隆宣夷阻之在運將全喪之由躬遊翰  
林之彪炳嘉美手於良工辭存麗而去穢旨既雅而能  
通雖源流之深浩且揚榷而發蒙習習飛蚋飄飆纖蠅  
緣幌求隙望燭思陵糜蘭膏而無悔赴朗燭而未懲瞻  
前軌之既覆忘改轍於後乘匪微物之足悼悵永念而  
撫膺彼人道之為貴參二儀而比靈稟清曠以授氣修  
緣督而為經照安危於心術鏡纖兆於未形有徇末而  
捨本或耽欲而忘生碎隨侯於微爵捐所重而要輕矧

昆蟲之所昧在智士之猶嬰悟雕陵於莊氏幾鑒濁而  
迷清仰前修之懿軌知吾跡之未并雖宋元之外古曷  
在予之克明豈知反之徒爾喟投翰以增情初奉迎大  
駕道路賦詩三首其一篇有悔懼之辭曰夙耀發皇邑  
有人徂我舟餞離不以幣贈言重琳球知止道攸貴懷  
祿義所尤四牡倦長路君轡可以收張邴結晨軌疎董  
頰夕輞東隅誠已謝西景逝不留性命安可圖懷此作  
前修數袵銘篤誨引帶佩嘉謀迷寵非予志厚德良未

訓撫躬愧疲朽三省慙爵浮重明照蓬艾萬品同率由  
忠誥宣假知式微發直謳亮自知傾覆求退無由又作  
卒有穆生董仲道讚稱其見微之美長子演祕書郎先  
亮卒演弟悝湛逃亡湛弟都徙建安郡世祖孝建之中  
竝還京師

檀道濟高平金鄉人左將軍韶少弟也少孤居喪備禮  
奉姊事兄以和謹致稱高祖創義道濟從入京城參高  
祖建武軍事轉征西討平魯山禽桓振除輔國參軍南

陽太守以建義勲封吳興縣五等侯盧循寇逆群盜互  
起郭寄生等聚作亂以道濟為揚武將軍天門太守討  
平之又從劉道規討桓謙荀林等率厲文武身先士卒  
所向摧破及徐道覆來逼道規親出拒戰道濟戰功居  
多遷安遠護軍武陵內史復為太尉參軍拜中書侍郎  
轉寧朔將軍參太尉軍事以前後功封作唐縣男食邑  
四百戶補太尉主簿諮議參軍豫章公世子為征虜將  
軍鎮京口道濟為司馬臨淮太守又為世子西中郎司

馬梁國內史復為世子征虜將軍司馬加冠軍將軍義  
熙十二年高祖北伐以道濟為前鋒出淮肥所至諸城  
戍望風降服進剋許昌獲偽寧朔將軍潁川太守姚坦  
及大將楊業至成臯偽兗州刺史韋華降逕進洛陽偽  
平南將軍陳留公姚沈歸順凡拔城破壘俘四千餘人  
議者謂應悉戮以為京觀道濟曰伐罪吊民正在今日  
皆釋而遣之於是戎夷感悅相率歸之者甚衆進據潼  
關與諸軍共破姚紹長安既平以為征虜將軍琅邪內

史世子當鎮江陵復以道濟為西中郎司馬持節南蠻  
校尉又加征虜將軍遷宋國侍中領世子中庶子兗州  
大中正高祖受命轉護軍加散騎常侍領石頭戍事聽  
直入殿省以佐命功改封永修縣公食邑二千戶徙為  
丹陽尹護軍如故高祖不豫給班劍二十人出監南徐  
兗之江北淮南諸郡軍事鎮北將軍南兗州刺史景平  
元年虜圍青州刺史竺夔於東陽城夔告急加道濟使  
持節監征討諸軍事與王仲德救東陽未及至虜燒營

樊攻具遁走將追之城內無食乃開窖取少穀窖深數丈出穀作米已經再宿虜去已遠不復可追乃止還鎮廣陵徐羨之將廢廬陵王義真以告道濟道濟意不同屢陳不可不見納羨之等謀欲廢立諷道濟入朝既至以謀告之將廢之夜道濟入領軍府就謝晦宿晦其夕竦動不得眠道濟就寢便熟晦以此服之太祖未至道濟入守朝堂上即位進號征北將軍加散騎常侍給鼓吹一部進封武陵郡公食邑四千戶固辭進封又增督

青州徐州之淮陽下邳琅邪東莞五郡諸軍事及討謝  
晦道濟率衆繼到彥之彥之戰敗退保隱圻會道濟至  
晦本謂道濟與羨之等同誅忽聞來上人情恍懼遂不  
戰自潰事平遷都督江州之江夏豫州之西陽新蔡晉  
熙四郡諸軍事征南大將軍開府儀同三司江州刺史  
持節常侍如故增封千戶元嘉八年到彥之伐索虜已  
平河南尋復失之金墉虎牢並沒虜逼滑臺加道濟都  
督征討諸軍事率衆北討軍至東平壽張縣值虜安平

公乙旃卷道濟率寧朔將軍王仲德驍騎將軍段宏奮  
擊大破之轉戰至高梁亭虜寧南將軍濟州刺史壽昌  
公悉頰庫結前後邀戰道濟分遣段宏及臺隊主沈虔  
之等奇兵擊之即斬悉頰庫結道濟進至濟上連戰二  
十餘日前後數十交虜衆盛遂陷滑臺道濟於歷城全  
軍而反進位司空持節常侍都督刺史並如故還鎮尋  
陽道濟立功前朝威名甚重左右腹心並經百戰諸子  
又有才氣朝廷疑畏之太祖寢疾累年屢經危殆彭城

王義康慮宮車晏駕道濟不可復制十二年上疾篤會  
索虜為邊寇召道濟入朝既至上閒十三年春將遣道  
濟還鎮已下船矣會上疾動召入祖道收付廷尉詔曰  
檀道濟階緣時幸荷恩在昔寵靈優渥莫與為比曾不  
感佩殊遇思答萬分乃空懷疑貳履霜日久元嘉以來  
猜阻滋結不義不昵之心附下罔上之事固已暴之民  
聽彰於遐邇謝靈運志凶辭醜不臣顯著納受邪說每  
相容隱又潛散金貨招誘剽猾逋逃必至寃繁彌廣日

夜伺隙希冀非望鎮軍將軍仲德往年入朝屢陳此迹  
朕以其位居台鉉豫班河岳彌縫容養庶或能革而長  
惡不悛凶慝遂遘因朕寢疾規肆禍心前南蠻行參軍  
龐延祖具悉奸狀密以啟聞夫君親無將刑茲罔赦況  
罪釁深重若斯之甚便可收付廷尉肅正刑書事止元  
惡餘無所問於是收道濟及其子給事黃門侍郎植司  
徒從事中郎粲太子舍人隰征北主簿承伯祕書郎遵  
等八人竝於廷尉伏誅又收司空參軍薛彤付建康伏

法又遣尚書庫部郎顧仲文建武將軍茅亨至尋陽收  
道濟子夷邕演及司空參軍高進之誅之薛彤進之竝  
道濟腹心有勇力時以比張飛關羽初道濟見收脫幘  
投地曰乃復壞汝萬里之長城邕子孺乃被宥世祖世  
為奉朝請

史臣曰夫彈冠出里結組登朝道申於夷路運艱於險  
轍是以古人裴回於出處交戰乎臨歧若其任重於身  
恩結自主雖復據鼎承歛悠然不以存歿為懷當二公

受言西殿跪承顧託若使死而可再固以赴蹈為期也及逢權定之期當震主之地甫欲攘抑後禍禦散身灾使桐宮有卒迫之痛淮王非中霧之疾若以社稷為存亡則義異於此但彭城無燕刺之釁而有楚英之戮若使一昆延歷亦未知定終所在也謝晦言不以賊遺君父豈徒言哉

宋書卷四十三

宋書卷四十三考證

徐羨之傳羨之等重奏曰近寫下情○近一本有陳  
字

時謝晦弟曠為黃門郎○門下一本有侍字

傅亮傳霜皚皚而被墉○皚皚諸本俱訛澁澁今據傳  
亮集改正

詠倚相之遺矩○矩監本訛矩今據傳亮集改正

宋書卷四十三考證

史部

欽定四庫全書會要卷四千二百六

宋書卷四十四

梁

沈

約

撰

列傳第四

謝晦

謝晦字宣明陳郡陽夏人也祖朗東陽太守父重會稽  
王道子驃騎長史兄絢高祖鎮軍長史蚤卒晦初為孟  
昶建威府中兵參軍昶死高祖問劉穆之孟昶參佐誰

堪入我府穆之舉晦即命為太尉參軍高祖嘗訊囚其  
旦刑獄參軍有疾札晦代之於車中一鑑訊牒催促便  
下相府多事獄繫殷積晦隨問酬辯曾無違謬高祖奇  
之即日署刑獄賊曹轉豫州治中從事義熙八年土斷  
僑流郡縣使晦分判揚豫民戶以平允見稱入為太尉  
主簿從征司馬休之時徐逵之戰敗見殺高祖怒將自  
披甲登岸諸將諫不從怒愈甚晦前抱持高祖高祖曰  
我斬卿晦曰天下可無晦不可無公晦死何有會胡藩

已得登岸賊退走乃止晦美風姿善言笑眉目分明鬢  
髮如點漆涉獵文義朗贍多通高祖深加愛賞羣僚莫  
及從征關洛內外要任悉委之劉穆之遣使陳事晦往  
往措異同穆之怒曰公復有還時否高祖欲以為從事  
中郎以訪穆之堅執不與終穆之世不遷穆之喪問至  
高祖哭之甚慟晦時正直喜甚自入閤內參審穆之死  
問其日教出轉晦從事中郎宋臺初建為右衛將軍尋  
加侍中高祖受命於石頭登臺備法駕入宮晦領游軍

為警備遷中領軍侍中如故以佐命功封武昌縣公食邑二千戶二年坐行璽封鎮西司馬南郡太守王華大封而誤封北海太守球版免晦侍中尋轉領軍將軍散騎常侍依晉中軍羊祜故事入直殿省總統宿衛三月高祖不豫給班斂二十人與徐羨之傅亮檀道濟竝侍醫藥少帝即位加領中書令與羨之亮共輔朝政少帝既廢司空徐羨之錄詔命以晦行都督荆湘閩益寧南北秦七州諸軍事撫軍將軍領諸南蠻校尉荊州刺史

欲令居外為援慮太祖至或用別人故遽有此授精兵  
舊將悉以配之器仗軍資甚盛太祖即位加使持節依  
本位除授晦慮不得去甚憂惶及發新亭顧望石頭城  
喜曰今得脫矣尋進號衛將軍加散騎常侍進封建平  
郡公食邑四千戶固讓進封又給鼓吹一部初為荊州  
甚有自矜之色將之鎮詣從叔光祿大夫澹別澹問晦  
年晦答曰三十三澹笑曰昔荀中郎年二十七為北府  
都督卿比之已為老矣晦有愧色至江陵深結侍中王

華冀以免禍二女當配彭城王義康新野侯義賓元嘉  
二年遣妻曹及長子世休送女還京邑先是景平中索  
虜為寇覆沒河南至是上欲誅羨之等并討晦聲言北  
伐又言拜景陵治裝舟艦傅亮與晦書曰薄伐河朔事  
猶未已朝野之慮憂懼者多又言朝士多諫北征上當  
遣外監萬幼宗往相諮訪時朝廷處分異常其謀頗泄  
三年正月晦弟黃門侍郎囉馳使告晦晦猶謂不然呼  
諮議參軍何承天示以亮書曰計幼宗一二日必至傳

公慮我好事故先遣此書承天曰外間所聞咸謂西討  
已定幼宗豈有上理晦尚謂虛妄使承天豫立答詔啟  
草伐虜宜須明年江夏內史程道惠得尋陽人書言朝  
廷將有大處分其事已審使其輔國府中兵參軍樂岡  
封以示晦晦又謂承天曰幼宗尚未至若復二三日無  
消息便是不復來邪承天答曰詔使本無來理如程所  
說其事已判豈容復疑晦欲焚南蠻兵籍率見力決戰  
士人多勸發兵乃立幡戒嚴謂司馬庾登之曰今當自

下欲屈卿以三千人守城備禦劉粹登之曰下官親老在都又素無旅情計二三不敢受此旨晦仍問諸佐戰士三千足守城不南蠻司馬周超對曰非徒守城而已若有外寇可以立勲登之乃曰超必能辦下官請解司馬南郡以授即於坐命超為司馬建威將軍南義陽太守轉登之為長史南郡如故太祖誅羨之等及晦子新除祕書郎世休收囑囑子世平兄子著作佐郎紹等樂同又遣使告晦徐傅二公及囑等竝已誅晦先舉羨之

亮哀次發子弟凶問既而自出射堂配衣軍旅數從高祖征討備覩經畧至是指揮處分莫不曲盡其宜二三日中四遠搜集得精兵三萬人乃奉表曰臣階緣幸會蒙武皇帝殊常之眷外聞政事內謀惟幄經綸夷險毗贊王業預佐命之勲膺河山之賞及先帝不豫導揚末命臣與故司徒臣羨之左光祿大夫臣亮征北將軍臣道濟等竝升御牀跪受遺詔載貽話言託以後事臣雖凡淺感恩自厲送往事居誠貫幽顯逮營陽失德自絕

宗廟朝野岌岌憂及禍難忠謀協契徇國忘已援登聖  
朝惟新皇祚陛下馳傳乘流曾不惟疑臨朝殷懃增崇  
封爵此則臣等赤心已亮於天鑒遠近萬邦咸達於聖  
旨若臣等志欲專權不顧國典便當協翼幼主孤背天  
日豈復虛館七旬仰望鸞旗者哉故廬陵王於營陽之  
世屢被猜嫌積怨犯上自貽非命天祚明德屬當昌運  
不有所廢將何以興成人之美春秋之高義立帝清館  
臣節之所司耿弇不以賊遺君父臣亦何負於宋室邪

況釁結閭牆禍成畏逼天下耳目豈伊可誣臣忝居蕃  
任乃誠匪懈為政小大必先啟聞糾剔羣蠻清夷境內  
分留弟姪竝侍殿省陛下聿遵先志申以婚姻童稚之  
目猥荷齒名薦女遷子合門相送事君之道義盡於斯  
臣羨之總錄百揆翼亮三世年耆乞退屢抗表疏優旨  
綢繆未垂順許臣亮管司喉舌恪處夙夜恭謹一心守  
死善道此皆皇宋之宗臣社稷之鎮衛而讒人傾覆妄  
生國釁天威震怒加以極刑并及臣門同被孥戮雖未

知臣道濟問推理即事不容獨存先帝顧託元臣翼命  
之佐勦於佞邪之手忠貞匪躬之輔不免夷滅之誅陛下  
春秋方富始覽萬機民之情偽未能鑒惡王弘兄弟  
輕躁昧進王華猜忌忍害規弄威權先除執政以逞其  
欲天下之人知與不知孰不為之痛心憤怨者哉臣等  
見任先帝垂二十載小心謹慎無纖介之愆伏事甫爾  
而嬰若斯之罪若非先帝謬於知人則為陛下未察愚  
款臣去歲末使反得朝士及殿省諸將書竝言嫌隙已

成必有今日之事臣推誠仰期罔有二心不圖姦回潛  
遭理順難恃忠賢隕朝愚臣見襲到彥之蕭欣等在近  
路昔白公稱亂諸梁嬰胄惡人在朝趙鞅入伐臣義均  
休戚任居分陝豈可顛而不扶以負先帝遺旨輒率將  
士繕治舟甲須其自送投袂撲討若天祚大宋卜世靈  
長義師克振中流清蕩便當浮舟東下戮此三豎申理  
寃耻謝罪闕庭雖伏鑽赴鑊無恨於心伏願陛下遠尋  
永初託付之旨近存元嘉奉戴之誠則微臣丹款猶有

可察臨表哽慨言不自盡太祖時已戒嚴諸軍相次進  
路尚書符荊州曰禍福無門逆順有數天道徵於影響  
人事鑒於前圖未有蹈義而福不延從惡而禍不至也  
故智計之士審敗以立功守正之臣臨難以全節徐羨  
之傳亮謝晦安忍鴉殺獲罪於天名教所極政刑所取  
已遠暴四海宣於聖詔羨之父子亮及晦息電斷之初  
竝即大憲復王室之讎撾義夫之憤國典澄明人神感  
悅三姓同罪既擒其二晦之室屬縲仆獄戶苟幽明所

怨孤根易拔以順討逆雖厚必崩然歸死難圖獸困則  
噬是以爰整其旅用為過防京師之衆天下雲集士練  
兵精大號響震使持節中領軍琅山縣開國侯到彥之  
率羽林選士果勁二萬雲旂首路組甲曜川使持節散  
騎常侍都督南徐兗之江北淮南青州徐州之淮陽下  
邳琅邪東莞七郡諸軍事征北將軍南兗州刺史永脩  
縣開國公檀道濟統勁銳武卒三萬戈船蔽江星言繼  
發千帆俱舉萬棹遄征散騎常侍驍騎將軍段宏鐵馬

二千風驅電擊步自竟陵直至鄖郢又命征虜將軍雍  
州刺史劉粹控河陰之師衝其巢窟湘州刺史張劭提  
湘州之衆直據要害巴蜀杜荆門之險秦梁絕丹圻之  
逕雲網四合走伏路盡然後鑾輿効駕六軍鵬翔警蹕  
前驅五牛整旆雖以英布之氣彭寵之資登陴無名授  
兵誰御加以西土之人咸沐皇澤東吳將士懷本首丘  
必不自陷罪人之黨橫為亂亡之役置軍則魚潰嬰城  
則鳥散其勢然矣聖上憇憇哀愍其罪由晦士民何幸

是用一分前麾宣示朝旨符到其即共收擒晦身輕舟  
護送若已猖蹶先事阻衛宜讎然背亂相率歸朝頃大  
刑所加洪恩曠洽傳亮三息特蒙全宥晦同產以下羨  
之諸姪咸無所染況彼府州文武竝列王職荷國榮任  
身雖在外乃心辰極夫轉禍貴速後機則凶遂使王師  
臨郊雷電皆至噬臍之恨亦將何及時益州刺史蕭摹  
之巴西太守劉道產被徵還始至江陵晦竝繫紲沒其  
財貨以充軍資竟陵內史殷道鸞未之郡以為諮詢參

軍以弟遜為冠軍竟陵內史總留任兄子世猷為建威  
將軍南平太守劉粹若至周超能破之者即以為龍驤  
將軍雍州刺史晦率二萬發自江陵舟艦列自江津至  
于破冢旛旂相照蔽奪目光晦乃歎曰恨不得以此為  
勤王之師自領湘州刺史以張劭為輔國將軍劭不受  
命晦檄京邑曰王室多故禍難薦臻營陽失德自絕宗  
廟廬陵王構閱有本屢被猜嫌且居喪失禮遐邇所具  
積怨犯上自貽非道羣后釋位爰登聖明亂之未乂職

有所係按車騎大將軍王弘侍中王曇首謬蒙時私叨  
竊權要弘於永初之始實荷不世之恩元嘉之讓自謂  
任遇浮淺進誣先皇委誠之寄退長嫌隙異同之端曇  
首往因使下訪以今上起居不能光揚令德彰於朝聽  
其言多誣故不具說王華賊亡之餘賞擢之次先帝常  
見訪逮庶有一分可取而華稟性凶猜多所忍害曩者  
縱人入城託疾辭事此都士庶咸所聞知以其所啟及  
上手答示宗叔獻又令宣告徐傅二公及周糾使下又

今見咨云欲自攬政事求離任還都并令曇首具述此  
意又惠觀道人說外人告華及到彥之謀反不謂無之  
城內東將數日之內操戈相待華說數為狄當所謂常  
不自安凡此諸事豈有忠誠冥契若此者邪自以父亡  
道側情事異人外絕酒醴而宵飲是恣覲貌缺

凡厥士庶誰不側目又常歎宰相頓有數人是何  
憤憤規總威權不顧國典保祐皇家者罹屠戮之誅效  
勤社稷者致殲夷之禍縉紳之徒孰不忼慨遂矯違詔

旨遣到彥之蕭欣之輕舟見襲即日監利左尉露檄衆  
軍已至揚子雖以不武忝荷蕃任國家艱難悲憤兼集  
若使小人得志君子道消凡百有殄瘁之哀蒼生深橫  
流之懼輒糾勒義徒繕治舟甲舳艤亘川駟介敝野武  
夫鷙勇人百其誠今遣南蠻司馬寧遠將軍庾登之統  
參軍事建武將軍建平太守安泰宣威將軍昭弘宗參  
軍事宣威將軍王紹之等精銳一萬前鋒致討南蠻參  
軍振武將軍魏像綱參軍事宣威將軍陳珍虎旅二千

參軍事建威將軍新興太守賀愔甲卒三千相係取道  
南蠻參軍振威將軍郭卓鐵騎二千水步齊舉大軍三  
萬駱驛電邁行冠軍將軍竟陵內史河東太守謝遜建  
威將軍南平太守謝世猷驍勇一萬留守江陵分命參  
軍長寧太守竇應期步騎五千直出義陽司馬建威將  
軍行南義陽太守周超之統軍司馬振武將軍胡崇之  
精悍一萬北出高陽長兼行參軍寧遠將軍朱澹之步  
騎五千西出雁塞同討劉粹並趨襄陽奇兵尚速指景

齊奮諸賢竝同國恩情兼義烈今誠志士忘身之日義  
夫著績之秋見機而動望風而不待勦晦至江口到彥  
之已到彭城洲庾登之據巴陵畏懦不敢進會霖雨連  
日參軍劉和之曰彼此共有雨耳檀征北尋至東軍方  
彊唯宜速戰登之恆怯使小將陳祐作大囊貯茅數千  
斛縣於颶檣云可以焚艦用火宜須晴以緩戰期晦然  
之遂停軍十五日乃攻蕭欣於彭城洲中兵參軍孔延  
秀率三千人進戰甚力欣於陳後擁楯自衛又委軍還

船於是大敗延秀又攻洲口柵陷之彥之退保隱圻晦  
又上表曰臣聞凶邪敗國先代成患讒豎亂朝異世齊  
禍故趙高矯逼秦氏用傾董卓階亂漢祚伊覆雖哲王  
宰世大明照臨未能使其漸弗興茲害不作姦臣王弘  
等竊弄威權興造禍亂遂與弟華內外影響同惡相成  
忌害忠賢圖希非望故司徒臣羨之左光祿大夫臣亮  
橫被酷害并及臣門雖未知征北將軍臣道濟存亡不  
容獨免遂遣蕭欣到彥之等輕舟見襲姦偽之甚一至

於斯羨之及亮或宿德元臣姻姪皇極或任總文武位  
班三事道濟職惟上將扞城是司皆受遇先朝棟梁一  
代臣昔因時幸過蒙先眷內聞政事外經戎旅與羨之  
亮等同被齒盼既經啟王基協濟大業爰自權輿暨于  
捐讓誠積雖微仍見紀錄竝蒙丹書之誓各受山河之  
賞欲使與宋升降傳之無窮及聖體不預穆卜無吉召  
臣等四人同升御牀顧命領遺委以家國仰奉成旨俯  
竭股肱忠貞不效期之以死但營陽悖德自絕於天社

稷之危憂在託付不有所廢將焉以興乃遠稽殷漢用  
升聖德陛下順流乘傳不聽張武之疑入邸龍飛非俟  
宋昌之議斯乃主臣相信天人合契九五當陽化形四  
海羨之及亮內贊皇猷臣與道濟分翰于外普天之下  
孰曰不宜遂蒙寵授來鎮此方分留弟姪以侍臺省到  
任以來首尾三載雖形在遠外心係本朝事無大小動  
皆咨啟八州之政罔一專輒尊上之心足貫幽顯陛下  
遠述先旨申以婚姻大息世休復蒙引召是以去年送

女遣兒闔家俱下血誠如此未知所愧而凶狡無端妄  
生釁禍羨之內誅臣受外伐顧省諸懷不識何臯天聽  
遐邇陳訴靡由弘等既蒙寵任得侍左右自謂勢擅狐  
鼠理隔熏掘又以陛下富於春秋始覽政事欲馮陵恩  
幸閑望國權親從盤跕規自封殖不除臣等罔得專權  
所以交結讒慝成是亂階又惟弘等所構當以營陽為  
言廬陵為臯又以臣等位高功同內外膠固陛下信其  
厚貌忘厥左道三至下機能不暫惑伏自尋省廢昏立

明事非為已廬陵之事不由傍人內積蕭牆之釁外行  
叔段之罰既制之有主臣何預焉然廬陵為性輕險悌  
順不足武皇臨崩亦有口詔比雖發自營陽實非國禍  
至於羨之亮等周旋同體心腹內外政欲戮力皇家盡  
忠報主若今臣等頗欲執權不專為國初廢營陽陛下  
在遠武皇之子尚有童幼擁以號令誰敢非之而泝流  
三千虛館三月奉迎鸞駕以遵下武血心若斯易為可  
鑒且臣等奉事先朝十有七年竝居顯要世稱恭謹不

圖一旦致茲釁罰夫周公大賢尚有流言之謗伯奇至  
孝不免譖惄之禍慈父非無情於仁子明君豈有志於  
貞臣姦遘所移勢回山岳况乃精誠微淺而望求信者  
哉詩不云乎讒人罔極交亂四國愷悌君子無信讒言  
陛下躬覽篇籍研覈是非釁兆之萌宜應深察臣竊懼  
王室小有皇甫之患大有閭樂之禍夙夜殷憂若無首  
領夫周道浸微桓文稱伐君側亂國趙鞅入誅況今凶  
禍滔天辰極危逼台輔孽戮岳牧傾陷臣才非絳侯安

漢是職人愧博陸。廁奉遺旨國難既深家痛亦切。輒簡  
徒繕甲。軍次巴陵蕭欣窘憚望風奔逃臣誠短劣在國  
忘身仰憑社稷之靈俯厲義勇之氣將長驅電掃直入  
石頭梟翦元凶誅夷首惡弔二公之冤魂寫私門之禍  
痛然後分歸司寇甘赴鼎鑊雖死之日猶生之年伏惟  
陛下德合乾元道侔玄極鑒凶禍之無端察貞亮之有  
本回日月之照發霜電之威梟四凶於廟庭懸三監於  
絳闕申二台之匪辜明兩蕃之無罪上謝祖宗下告百

姓遣一乘之使賜咫尺之書臣便勒衆旋旗還保所任  
須次近路尋復表聞初晦與徐羨之傅亮謀為自全之  
計晦據上流而檀道濟鎮廣陵各有彊兵以制持朝廷  
羨之亮於中秉權可得持久及太祖將行誅王華之徒  
咸云道濟不可信太祖曰道濟止於脅從本非事主殺  
害之事又所不關吾召而問之必異於是詔道濟入朝  
授之以衆委之西討晦聞羨之等死謂道濟必不獨全  
及聞率衆來上惶懼無計道濟既至與彥之軍合牽盤

緣岸晦始見艦數不多輕之不即出戰至晚因風帆上  
前後連咽西人離阻無復鬪心臺軍至忌置洲尾列艦  
過江晦大軍一時潰散晦夜出投巴陵得小船還江陵  
初鄆州刺史劉粹遣弟竟陵太守道濟與臺軍主沈敬  
之襲江陵至沙橋周超率萬餘人與戰大破之俄而晦  
敗問至晦至江陵無它處分唯愧謝周超而已超其夜  
舍軍單舸詣到彥之降衆散略盡乃攜其弟遜兄子世  
基等七騎北走遜肥壯不能騎馬晦每待之行不得速

至安陸延頸為戍主光順之所執順之晦故吏也檻送  
京師於路作悲人道其詞曰悲人道兮悲人道之賓難  
哀人道之多險傷人道之寡安懿華宗之冠胄固清流  
而遠源樹文德於庭戶立操學於衡門應積善之餘祐  
當履福之所延何小子之凶放實招禍而作愆值革變  
之大運遭一顧於聖皇參謀猷於創物贊帝制於宏綱  
出治戎於禁衛入闢言於帷房分河山之珪組繼文武  
之龜章稟顧命於西殿受遺寄於御牀伊懦劣其無節

實懷此而不忘荷隆遇於先主欲報之於後王憂託付之無効懼愧言於存亡謂繼體其嗣業能增輝於前光居遏密之未幾越禮度而酒荒普天壞而殞氣必社稷之淪喪矧吾儕之體國實啟處而匪遑藉億兆之一志固昏極而明彰諒主尊而民宴信卜祚之無疆國既危而重構家已衰而載昌獲扶顛而休否冀世道之方康朝褒功以疏爵祗命服於西蕃奏簫管之嘈噴擁朱旄之赫煌臨八方以作鎮響文武之桓桓厲薄弱以為政

實忘食於日旰。豈申甫之敢慕庶。惟宋之屏翰。甫逾歷其三稔。實周回其未再。豈有慮於內缺。其云

裁痛夾輔之二宰。竝加辟而靡貸。哀弱息之從禍。悲發中而心晦。伊荆漢之良彥。逮文武之子民。見忠貞而弗亮。覩理屈而莫申。皆義槩而同憤。咸荷戈而競臻。浮舳艤之奕奕。陳車騎之鱗鱗。觀人和與。師整謂茲兵。其誰陳庶亡魂之雪怨。反涇渭於彙倫。齊輕舟於江曲。殄銳敵。其皆湮勒陸徒於白水。寇無反於隻輪。氣有捷而益。

壯威既肅而彌振嗟時哉之不與迂風雨以踰旬我謀  
戰而不克彼繼奔其躡塵乏智勇之奇正忽孟明而是  
遵苟成敗其有數豈怨天而尤人恨矢石之未竭遂催  
師而覆陳誠得喪之所遭固當之其無吝痛同懷之弱  
子橫遭罹之殃釁智未窮而事傾力未極而莫振誓同  
盡於鋒鏑我怯力而愆信愍弟姪之何辜實吾咎之所  
嬰謂九夷其可處思致免以全生詹性命之難遂乃窘  
絕於邊亭亦何忤於天地備艱危而是丁我聞之於昔

誥功彌高而身蹶霍芒刺而幸免卒傾宗而滅族周嘆  
貴於獄吏終下薦而靡鞠雖明德之大賢亦不免於殘  
戮懷今憚而忍人忘向惠而莫復續無賞而震主將何  
方以自牧非矇石之圈照孰違禍以取福著殷鑑於自  
古豈獨歎於季叔能安親而揚名諒見稱於先哲保歸  
全而終孝傷在余而皆缺辱歷世之平素忽盛滿而傾  
滅惟蒸嘗與灑掃痛一朝而永絕問其誰而為之寃孤  
人之險戾臯有踰於丘山雖萬死其何雪羈角偃兮衡

閭親朋交兮平義雖復尚兮不一隆分好兮情寄俱憚  
耕兮從祿覩世道兮艱謏規志局兮功名每謂之兮為  
易今定謐兮閭棺慙明智兮昔議雖待盡兮為耻膺厚  
顏兮靡寘長揖兮數子謝爾兮明智百齡兮浮促終焉  
兮斟克臥盡兮斧斤理命兮同得世安彼兮非此宜曉  
兮兮辨惑御莊生之達言請承風以為則周超既降到  
彥之以參府事劉粹遣參軍沈敬之告彥之沙橋之敗  
事由周超彥之乃執之先繫羈等猶未即戮於是與晦

遜兄子世基世猷及同黨庾登之孔延秀周超費愔竇應期蔣虔嚴千斯等並伏誅世基絢之子也有才氣臨死為連句詩曰偉哉橫海鱗壯矣垂天翼一旦失風水翻為螻蟻食晦續之曰功遂侔昔人保退無智力既涉太行險斯路信難陟晦死時年三十七庾登之殷道鸞何承天並皆原免初河東人商玄石為晦參軍晦為逆玄石密欲推西人庾田夫及到彥之從弟為主田夫等不敢許知玄石獨謀不立遂為晦領幢事既平恨本心

之不遂投水死太祖嘉之以其子懷福為衡陽王義季  
右軍參軍督護晦走左右皆棄之唯有延陵蓋追隨不  
舍太祖嘉之後以蓋為長沙王義欣鎮軍功曹督護  
史臣曰謝晦坐璽封違謬遂免侍中斯有以見高祖之  
識治宰臣之稱職也夫孥戮所施事行重釁左黜或用  
義止輕愆輕愆物之所輕重釁人之所重故斧鉞希行  
於世徽簡日用於朝雖貴臣細故不以任隆弛法至乎  
下肅上尊用此道也自太祖臨務茲典稍違網以疏行

法為恩息妨德害美抑此之由降及大明傾波愈甚自  
非許竊深私陵犯密諱則左降之科不行於權戚若有  
身觸盛旨釁非國刑免書裁至弔客固望其門矣由是  
律無恒條上多弛行綱維不舉而網目隨之所以吉人  
防著在微慎大由小蓋為此云

宋書卷四十四

宋書卷四十四考證

謝晦傳父重會稽王道子驃騎長史○重監本訛事今  
從晉書南史改正

領諸南蠻校尉荊州刺史○諸南史作護

行南義陽太守周超之○周監本訛王今改正

史臣論自非許竊深私陵犯密諱○許一本作許

宋書卷四十四考證

謹案卷四十三第十一頁後五行亮既出刊本既訛即據明監本改

卷四十四第二頁後二行坐行璽封鎮西司馬南  
郡太守王華大封據南史無大封二字疑衍





總校官庶吉士臣侍朝

校對官檢討臣王福清

謄錄舉人臣勵守訓

欽定四庫全書會要

史部

宋書卷四十五



欽定四庫全書

宋書卷四十五

史部

宋書卷四十五

梁

沈

約

撰

傳第五

王鎮惡

檀韶

向靖

劉懷慎

劉粹

王鎮惡北海劇人也祖猛字景畧苻堅僭號關中猛為  
將相有文武才北土重之父休為河東太守鎮惡以五  
月五日生家人以俗忌欲令出繼疎宗猛見奇之曰此

非常兒昔孟嘗君惡日生而相齊是兒亦將興吾門矣故名之為鎮惡年十三而苻氏敗亡關中擾亂流寓崤陘之間嘗寄食渴池人李方家方善遇之謂方曰若遭遇英雄主要取萬戶侯當厚相報方答曰君丞相孫人才如此何患不富貴至時願見用為本縣令足矣後隨叔父曜歸晉客居荊州頗讀諸子兵書論軍國大事騎乘非所長闢弓亦甚弱而意畧縱橫果決能斷廣固之役或薦鎮惡於高祖時鎮惡為天門臨澧令即遣召之

既至與語甚異焉因留宿明日謂諸佐曰鎮惡王猛之孫所謂將門有將也即以為青州治中從事史行參軍太尉軍事署前部賊曹拒盧循於查浦屢戰有功封博陸縣五等子高祖謀討劉毅鎮惡曰公若有事西楚請賜給百舸為前驅義熙八年劉毅有疾求遣從弟兗州刺史藩為副貳高祖偽許之九月大軍西討轉鎮惡參軍事加振武將軍高祖至姑熟遣鎮惡率龍驤將軍蒯恩百舸前發其月二十九日也戒之曰若賊知吾上

比軍至亦當少日耳政當岸上作軍未辦便下船也卿至彼深加籌量可擊便燒其船艦且浮舸水側以待吾至慰勞百姓宣揚詔旨并赦文及吾與衛軍府文武書罪止一人其餘一無所問若賊都不知消息未有備防可襲便襲今去但云劉兗州上鎮惡受命便晝夜兼行於鵠洲尋陽河口巴陵守風凡四日十月二十二日至豫章口去江陵城二十里自鎮惡進路揚聲劉兗州上毅謂為信然不知見襲鎮惡自豫章口捨船步上崩恩

軍在前鎮惡次之舸留一二人對舸岸上豎六七旗下  
輒安一鼓語所留人計我將至城便長嚴令後有大軍  
狀又分隊在後令燒江津船艦鎮惡逕前襲城語前軍  
若有問者但云劉兗州至津戍及百姓皆言劉藩實上  
晏然不疑未至城五六里逢毅要將朱顯之與十許騎  
步從者數十欲出江津問是何人答云劉兗州至顯之  
馳前問藩在所答云在後顯之既見軍不見藩而見軍  
人擔彭排戰具望見江津船艦已被燒烟焰張天而鼓

嚴之聲甚盛知非蕃上便躍馬馳去告毅外有大軍似  
從下上垂已至城江津船悉被火燒矣行令閉諸城門  
鎮惡亦馳進軍人緣城得入門猶未及下關因得開大  
城東門大城內毅凡有八隊帶甲千餘已得戒嚴刺思  
入東門便北回擊射堂前攻金城東門鎮惡入東門便  
直擊金城西門軍分攻金城內東從舊將猶有六隊千  
餘人西將及能細直吏快手復有二千餘人食時就鬪  
至中晡西人退散及歸降畧盡鎮惡入城便因風放火

燒大城南門及東門又遣人以詔及赦文并高祖手書  
凡三函示毅毅皆燒不視金城內亦未信高祖自来有  
王桓者家在江陵昔手斬桓謙為高祖所賞拔常在左  
右求還西迎家至是率十餘人助鎮惡戰下晡間於金  
城東門北三十步鑿城作一穴桓便先衆入穴鎮惡自  
後繼之隨者稍多因短兵接戰鎮惡軍人與毅東將或  
有是父兄弟子弟中表親親者鎮惡令且鬪且共語衆並  
知高祖自來人情離懈一更許聽事前陣散潰斬義勇

將趙蔡毅左右兵猶閉東西閭拒戰鎮惡慮闇夜自相  
傷犯乃引軍出繞金城開其南面以為退路毅慮南有  
伏兵二更中率左右三百許人開北門突出初毅常所  
乘馬在城外不得入倉卒無馬毅便就子肅民取馬肅  
民不與朱顯之謂曰人取汝父而惜馬不與汝今自走  
欲何之奪馬以授毅初出政值鎮惡軍衝之不得去回  
衝荆恩軍軍人鬪已一日疲倦毅得從大城東門出奔  
牛牧佛寺自縊死鎮惡身被五箭射鎮惡手所執稍於

手中破折江陵平後二十日大軍方至署中兵出為安遠護軍武陵內史以討劉毅功封漢壽縣子食邑五百戶蠻帥向博抵根據阮頭屢為凶暴鎮惡討平之初行告刺史司馬休之求遣軍以為聲援休之遣其將朱襄領衆助鎮惡會高祖西討休之鎮惡乃告諸將曰百姓皆知官軍已上朱襄等復是一賊表裏受敵吾事敗矣乃率軍夜下江水迅急倏忽行數百里直據都尉治既至乃以竹籠盛石堙塞水道襄軍下夾岸擊之斬襄首

殺千餘人鎮惡性貪既破襄因停軍抄掠諸蠻不時反及至江陵休之已平高祖怒不時見之鎮惡笑曰但令我一見公無憂矣高祖尋登城喚鎮惡鎮惡為人彊辯有口機隨宜酬應高祖乃釋休之及魯宗之奔襄陽鎮惡統蒯恩諸軍水路追之休之等奔羌鎮惡追蹤盡境而還除游擊將軍十二年高祖將北伐轉鎮惡為咨議參軍行龍驤將軍領前鋒將發前將軍劉穆之見鎮惡於積弩堂謂之曰公愍此遺黎志蕩逋逆昔晉文王委

伐蜀於鄧艾今亦委卿以關中想勉建大功勿孤此授  
鎮惡曰不尅咸陽誓不復濟江而還也鎮惡入賊境戰  
無不捷邵陵許昌望風奔散破虎牢及栢谷塉斬賊帥  
趙玄軍次洛陽偽陳留公姚洸歸順進次澠池造故人  
李方家升堂見母厚加酬賚即版授方為澠池令遣司  
馬毛德祖攻偽弘農太守尹雅於蠡城生擒之仍行弘  
農太守方軌長驅徑據潼關偽大將軍姚紹率大衆拒  
簽深溝高壘以自固鎮惡懸軍遠入轉輸不充與賊相

持久將士乏食乃親到弘農督上民租百姓競送義粟軍食復振初高祖與鎮惡等期若駐洛陽須大軍至未可輕前既而鎮惡等逕向潼關為紹所拒不得進而軍又乏食馳告高祖求遣糧援時高祖沿河索虜屯據河岸軍不得前高祖呼所遣人開船北戶指河上虜示之曰我語令勿進而輕佻深入岸上如此何由得遣軍鎮惡既得義租紹又病死偽撫軍姚讚代紹守險衆力猶盛高祖至湖城讚引遐大軍次潼關謀進取之計鎮惡

請率水軍自河入渭偽鎮北將軍姚彊屯兵涇上鎮惡  
遣毛德祖擊破之直至渭橋鎮惡所乘皆蒙衝小船行  
船者悉在艦內羌見艦泝渭而進艦外不見有乘行船  
人北士素無舟楫莫不驚惋咸謂為神鎮惡既至令將  
士食畢便棄船登岸渭水流急倏忽間諸艦悉逐流去  
時姚泓屯軍在長安城下猶數萬人鎮惡撫慰士卒曰  
卿諸人並家在江南此是長安城北門外去家萬里而  
舫乘衣糧並已逐流去豈復有求生之計邪唯宜死戰

可以立大功不然則無遺類矣乃身先士卒衆亦知無復退路莫不騰踊爭先泓衆一時奔潰即陷長安城泓挺身逃走明日率妻子歸降城內夷晉六萬餘戶鎮惡宣揚國恩撫慰初附號令嚴肅百姓安堵高祖將至鎮惡於灞上奉迎高祖勞之曰成吾霸業者真卿也鎮惡再拜謝曰此明公之威諸將之力鎮惡何功之有焉高祖笑曰卿欲學馮異也是時關中豐全倉庫殷積鎮惡極意收斂子女玉帛不可勝計高祖以其功大不問也

進號征虜將軍時有白高祖以鎮惡既克長安藏姚泓  
偽輦為有異志高祖密遣人覘輦所在泓輦飾以金銀  
鎮惡悉別取而棄輦於垣側高祖聞之乃安高祖留第  
二子桂陽公義真為安西將軍雖秦二州刺史鎮長安  
鎮惡以本號領安西司馬馮翊太守委以扞禦之任時  
西虜佛彊盛姚興世侵擾北邊破軍殺將非一高祖  
既至長安佛彊畏憚不敢動及大軍東還便寇逼北地  
義真遣中兵參軍沈田子距之虜甚盛田子屯劉回堡

遣使還報鎮惡鎮惡對田子使謂長史王脩曰公以十  
歲兒付吾等當各思竭力而擁兵不進寇虜何由得平  
使還具說鎮惡言田子素與鎮惡不協至是益激怒二  
人常有相圖志彼此每相防疑鎮惡率軍出北地為田  
子所殺事在序傳時年四十六田子又於鎮惡營內殺  
鎮惡兄基弟鴻遵淵及從弟昭朗弘凡七人是歲十四  
年正月十五日也高祖表曰故安西司馬征虜將軍王  
鎮惡志節亮直機畧明舉自策名州府屢著誠績荆南

遘釁勢據上流難興彊蕃憂兼內侮鎮惡輕舟先邁神  
兵電臨旰食之虞一朝霧散及王師西伐有事中原長  
驅洛陽肅清湖陝入渭之捷指麾無前遂廓定咸陽俘  
執偽后克成之効莫與為疇實扞城所寄國之方召也  
近北虜遊魂寇掠渭北統率衆軍曜威撲討賊既還奔  
還次涇上故龍驤將軍沈田子忽發狂易奄加刃害忠  
勲未究受禍不圖痛惜兼至惋悼無已伏惟聖懷為之  
傷惻田子狂悖即已備憲鎮惡誠著艱難勲參前烈殊

績未酬宜蒙追寵願敕有司議其褒贈於是追贈左將軍青州刺史高祖受命追封龍陽縣侯食邑千五百戶謚曰壯侯配食高祖廟廷子靈福嗣位至南平王鑠右軍諮議參軍靈福卒子述祖嗣述祖卒子叡嗣齊受禪國除鎮惡弟康留關中及高祖北伐鎮惡為前鋒康逃匿田舍鎮惡次潼關康將家奔之高祖板為彭城公前將軍行參軍鎮惡被害康逃藏得免攜家出洛陽到彭城歸高祖即以康為相國行參軍求還洛陽視母尋值

開陝不守康與長安徙民張盱醜劉雲等唱集義徒得  
百許人驅率邑郭僑戶七百餘家共保金墉城為守戰  
之備時有一人邵平率部曲及并州乞活一千餘户屯  
城南迎亡命司馬文榮為主又有亡命司馬道恭自東  
垣率三千人屯城西亡命司馬順明五千人屯陵雲臺  
順明遣刺殺文榮平復推順明為主又有司馬楚之屯  
栢谷塢索虜野坂戍主異彊公遊騎在芒上攻逼交至  
康堅守六旬宋臺建除康寧朔將軍河東太守遣龍驤

將軍姜缺率軍救之諸亡命並各奔散高祖嘉康節封西平縣男食邑三百戶進號龍驤將軍迎康家還京邑勸課農桑百姓甚親賴之永初元年卒金墉時年四十九葬於偃師城西追贈輔國將軍無子以兄河西太守基子天祐嗣當太祖元嘉二十七年隨劉康祖伐索虜敗沒子懷祖嗣

檀韶字令孫高平金鄉人也世居京口初辟本州從事西曹主簿輔國司馬高祖建義韶及弟祗道濟等從平

京城行參高祖建武將軍事都邑既平為鎮軍將軍加  
寧遠將軍東海太守進號建武將軍遷龍驤將軍秦郡  
太守北陳留內史以平桓玄功封巴丘縣侯食邑五百  
戶復參車騎將軍事加龍驤將軍遷騎將中軍諮議參  
軍加寧朔將軍從征廣固率向彌胡藩等五十人攻臨  
朐城克之及圍廣固慕容超夜燒樓當韶圍分降號橫  
野將軍城陷之日韶率所領先登領北琅邪太守進號  
寧朔將軍琅邪內史從討盧循於左里又有戰功并論

廣固功更封宜陽縣侯食邑七百戶降先封一等為伯減戶之半二百五十戶賜祇子臻坐六門內乘輿白衣領職義熙七年號輔國將軍八年丁母憂起為冠軍將軍明年復為琅邪內史淮南太守將軍如故鎮姑熟尋進號左將軍領本州大中正十二年遷督江州豫州之西陽新蔡二郡諸軍事江州刺史將軍如故有罪免官高祖受命以佐命功增八百戶并前千五百戶韶嗜酒貪橫所莅無績上嘉其合門從義弟道濟又有大功效

特見寵授永初二年卒於京邑時年五十六追贈安南  
將軍加散騎常侍子緒嗣緒卒無子國除祇子臻臻卒  
子遐嗣齊受禪國除祇弟道濟並別有傳

向靖字奉仁小字彌河內山陽人也名與高祖祖同改稱  
小字世居京口與高祖少舊從平京城參建武軍事進  
平京邑板參鎮軍軍事加寧遠將軍京邑雖平而羣寇  
互起彌與劉藩孟龍符征破桓歆桓石康石綏於白茅  
攻壽陽尅之義熙三年遷建武將軍秦郡太守北陳留

內史成堂邑以平京城功封山陽縣五等侯從征鮮卑  
大戰於臨朐累月不決彌與檀韶等分軍自間道攻臨  
朐城彌擐甲先登即時潰陷斬其牙旗賊遂奔走攻拔  
廣固彌又先登盧循屯據蔡洲以親黨阮賜為豫州刺  
史攻逼姑孰彌率譙國內史趙恢討之時輔國將軍毛  
脩之戍姑孰告急續至彌兼行進討破賜收其輜重除  
中軍諮議參軍將軍如故盧循退走高祖南征彌為前  
鋒於南陵電池左里三戰並大捷軍還除太尉諮議參

軍下邳太守將軍如故八年轉遊擊將軍尋督馬頭淮  
西諸郡軍事龍驤將軍鎮蠻護軍安豐汝陰二郡太守  
梁國內史戍壽陽以平廣固盧循功封安南縣男食邑  
五百戶十年遷冠軍將軍高陽內史臨淮太守領石頭  
戍事高祖西伐司馬休之以彌為吳興太守將軍如故  
明年高祖北伐彌以本號侍從留戍碭礮進屯石門栢  
谷遷督北青州諸軍事北青州刺史將軍如故高祖受  
命以佐命功封曲江縣侯食邑千戶遷太子左衛率加

散騎常侍一年卒官時年五十九追贈前將軍彌治身  
儉約不營室宇無園田商貨之業時人稱之子植嗣多  
過失不受母訓奪爵更以植次弟楂紹封又坐殺人國  
除植弟柳字玄季有學義才能立身方雅無所推先諸  
盛流並容之太尉袁淑司空徐湛之東揚州刺史顏立  
皆與友善歷始興王濬征北中兵參軍始興內史南康  
相臧質為逆召柳至尋陽與之俱下質敗歸降下獄死  
彌弟劭永初中為宣城太守劭弟子亮以私忿殺彌妻

施氏託云奴客所殺劭輒於墓所殺亮及彌妾并奴婢七八人匿不聞官為有司所奏詔無所問元嘉初卒於義興太守

劉懷慎彭城人左將軍懷肅弟也少謹慎質直始參高祖鎮軍騎將軍事振威將軍彭城內史從征鮮卑每戰必身先士卒及克廣固懷慎率所領先登從高祖拒盧循於石頭屢戰克捷加輔國將軍義熙八年以本號監北徐州諸軍事鎮彭城尋加徐州刺史為政嚴猛境內

震肅九年亡命王靈秀為寇討平之十一年進北中郎將以平廣固盧循功封南城縣男食邑五百戶十三年高祖北伐以為中領軍征虜將軍衛輦轂坐府中相殺免官雖名位轉優而恭恪愈至每所之造位任不踰已者皆束帶門外下車其謹退類如此宋臺立召為五兵尚書仍督江北淮南諸軍前將軍南晉州刺史復徵為度支尚書加散騎常侍高祖遷都壽春留懷慎督北徐兗青淮北諸軍事中軍將軍徐州刺史以亡命入廣陵

城降號征虜將軍永初元年以佐命功進爵為侯增邑  
千戶進號平北將軍徵為五兵尚書加散騎常侍光祿  
大夫景平元年遷護軍將軍常侍如故特賜班於宗族  
家無餘財一年卒時年六十一追贈撫軍謚曰肅侯子  
德願嗣世祖大明初為游擊將軍領石頭戍事坐受賈  
客韓佛智貨下獄奪爵上後復為秦郡太守德願性麤  
率為世祖所狎侮上寵姬殷貴妃薨葬畢數與羣臣至  
殷墓謂德願曰卿哭貴妃若悲當加厚賞德願應聲便

號慟撫膺擗踴涕泗交流上甚悅以為豫州刺史又令  
醫術人羊志哭殷氏志亦嗚咽他日有問志卿那得此  
副急淚志時新喪愛姬答曰我爾時自哭亡妾耳志滑  
稽善為諧謔上亦愛狎之德願善御車嘗立兩柱使其  
中劣通車軸乃於百餘步上振轡長驅未至數尺打牛  
奔從柱間直過其精如此孝武聞其能為之乘畫輪車  
幸太宰江夏王義恭第德願岸著籠冠短朱衣執轡進  
止甚有容狀永光中為廷尉與柳元景厚善元景敗下

獄誅懷慎庶長子榮祖少好騎射為武帝所知及盧循  
攻逼時賊乘小艦入淮拔柵武帝宣令三軍不得輒射  
賊榮祖不勝憤怒冒禁射之所中應弦而倒帝益竒焉  
以戰功參太尉軍事從討司馬休之彭城內史徐達之  
敗沒諸將意沮榮祖請戰愈厲高祖乃解所著鎧以授  
之榮祖率所領陷陣身被數創會賊破走加振威將軍  
尋參世子征虜軍事領遂成令高祖北伐轉鎮西中兵  
參軍寧遠將軍水軍入河與朱超石大破索虜於半城

又攻劉度壘克之高祖大饗戰士謂榮祖曰卿以寡克衆攻無堅城雖古名將何以過此轉為太尉中兵參軍加建威將軍既破長安姚泓女婿徐衆率其餘衆連營叛走榮祖與檀道濟等攻營破之斬首擒馘不可稱計十四年除彭城內史又補相國參軍其年遣榮祖還都為世子中兵參軍永初元年除越騎校尉尋轉右軍將軍索虜南寇司州刺史毛德祖陷沒榮祖時居父艱起為輔國將軍追論半城之功賜爵都鄉侯榮祖為人輕

財貴義善撫將士然性偏險褊隘頗失士君子之心領  
軍將軍謝晦深接待之廢立之際要榮祖固辭獲免及  
晦出鎮荆楚欲請為南蠻校尉榮祖又固止之其年冬  
卒德願弟興祖青州刺史懷慎弟懷默冠軍將軍江夏  
內史太中大夫懷默子道球巴東建平二郡太守道球  
弟孫登武陵內史孫登子亮世祖大明中為武康令時  
境內多盜鑄錢亮掩討無不禽所殺以千數太宗泰始  
初為巴陵王休若鎮東中兵參軍北伐南討功冠諸將

封順陽縣侯食邑六百戶歷黃門郎梁益二州刺史在任廉儉不營財貨所餘公祿悉以還官太宗嘉之下詔褒美亮在梁州忽服食脩道欲致長生迎武當山道士孫道膺令合仙藥至益州泰豫元年藥始成而未出火毒孫不聽亮服亮苦欲服平旦開城門取井華水服至食鼓後心動如刺中間便絕後人逢見乘白馬將數十人出關西行共語分明此乃道家所謂尸解者也追贈冠軍將軍謚曰剛侯孫登弟道隆元嘉二十二年為廬

江太守世祖舉義棄郡來奔以補南中郎參軍事加龍  
驤將軍時世祖分麾下以為三幢道隆與中兵參軍王  
謙之馬文恭各領其一大明中歷黃門侍郎徐青冀三  
州刺史前廢帝景和中以為右衛將軍永昌縣侯食邑  
五百戶委以腹心之任泰始初為太守盡力遷衛將軍  
中護軍尋賜死事在建安王休仁傳王謙之字休光琅  
邪臨沂人晉司州刺史胡之曾孫也世祖初歷驍騎將  
軍御史中丞吳興太守以南下之功封石陽縣子食邑

五百戶大明三年卒贈前將軍諡曰肅子應之嗣大明  
末為衡陽內史晉安王子勛反應之起義拒湘州行事  
何慧文為慧文所殺事在鄧琬傳追贈侍中應之弟雲  
之順帝昇明中貴達馬文恭扶風人也亦以功封泉陵  
縣子食邑五百戶世祖即位為遊擊將軍頃之卒

劉粹字道沖沛郡蕭人也祖恢持節監河中軍事征虜  
將軍粹家在京口少有志幹初為州從事高祖克京城  
參建武軍事從平京邑轉參鎮軍事尋加建武將軍沛

郡太守又領下邳太守復為車騎中軍參軍從征廣固  
戰功居多以義功封西安縣五等侯軍還轉中軍諮議  
參軍盧循逼京邑京口任重太祖時年四歲高祖使粹  
奉太祖鎮京城轉游擊將軍遷建威將軍江夏相衛將  
軍毅粹族兄也粹盡心高祖不與毅同高祖欲謀毅衆  
並疑粹在夏口高祖愈信之及大軍至粹竭其誠力事  
平封濁縣男食邑五百戶母憂去職俄而高祖討司馬  
休之起粹為寧朔將軍竟陵太守統水軍入河明年進

號輔國將軍遷相國右司馬侍中中軍司馬冠軍將軍  
遷左衛將軍永初元年以佐命功改封建安縣侯食邑  
千戶二年以役使監吏免官尋督江北淮南郡事征虜  
將軍廣陵太守三年以本號督豫司雍并四州南豫州  
之梁郡弋陽馬頭三郡諸軍事豫州刺史領梁郡太守  
鎮壽陽治有政績少帝景平二年譙郡流離六十餘家  
叛沒虜趙炅秦剛等六家悔倍還投陳留襄邑縣頓謀  
等村粹遣將苑縱夫討叛戶不及因誅殺謀等三十家

男丁一百三十七人女弱一百六十二口收付作部粹  
坐貶號為寧朔將軍時索虜南寇粹遣將軍李德元襲  
許昌殺偽潁川太守庾龍於是陳留人董邈自稱小黃  
盟主斬偽征虜將軍廣州刺史司馬世賢傳首京都太  
祖即位遷使持節督雍梁南北秦四州荊州之南陽竟  
陵順陽襄陽新野隨六郡諸軍事征虜將軍領寧蠻校  
尉雍州刺史襄陽新野二郡太守在任簡役愛民罷諸  
沙門二千餘人以補府史元嘉三年討謝晦遣粹弟車

騎從事中郎道濟龍驤將軍沈敞之就粹自陸道向江陵粹以道濟行竟陵內史與敵之及南陽太守沈道興步騎至沙橋為晦司馬周超所敗士衆傷死者過半降號寧朔將軍初晦與粹厚善以粹子曠之為參軍粹受命南討一無所顧太祖以此嘉之晦遣送曠之還粹亦不害也明年粹卒時年五十三追贈安北將軍持節本官如故曠之嗣官至晉熙太守曠之卒子琛嗣琛卒無子國除琛弟亮順帝昇明末尚書駕部郎粹庶長子懷

之為臨川內史與臧質同逆伏誅粹弟道濟尚書起部  
郎王弘車騎從事中郎江夏王義恭撫軍司馬河東太  
守仍遷振武將軍益州刺史長史費謙別駕張熙參軍  
楊德年等並聚斂興利而道濟委任之傷政害民民皆  
怨毒太祖聞之與道濟詔戒之曰聞卿在任未盡清省  
又頗為殖貨若萬一有此必宜改之比傳人情不政緝  
諧當以法御下深思自警以副本望道濟雖奉此旨政  
化如初有司馬飛龍者自稱晉之宗室晉末走仇池元

嘉九年聞道濟綏撫失和遂自仇池入綿竹崩動羣山  
得千餘人破巴興縣殺令王貞之進攻陰平陰平太守  
沈法興焚城遁走道濟遣軍擊飛龍斬之初道濟以五  
城人帛氏奴梁顯為參軍督護費謙固執不與遠方商  
人多至蜀土資貨或有直數百萬者謙等限布絲綿各  
不得過五十斤馬無善惡限蜀錢二萬府又立治一斷  
私民鼓鑄而貴賣鐵器商旅吁嗟百姓咸欲為亂氏奴  
既懷恚忿因聚黨為賊盜其年七月道濟遣羅習為五

城令氐奴等謀曰羅令是使君腹心而卿猶有作賊盜  
不止者一旦發露則為禍不測宜結要誓共相禁檢乃  
殺牛盟誓俄而氐奴及趙廣等唱曰官禁殺牛而村中  
公違法禁脫使羅令白使君疑吾徒更欲作賊則無餘  
類矣因詐言司馬殿下猶在陽泉山中若能共建大事  
則功名可立不然立滅不久衆既樂亂因相率從之得  
數千人復向廣漢道濟遣參軍程展會治中李抗之五  
百人擊之並為所殺賊於是逕向涪城巴西人唐頻聚

衆應之寧遠將軍巴西梓潼二郡太守王懷業再遣軍拒之戰敗失利懷業及司馬南漢中太守韋處伯並棄城走涪陵太守阮惠江陽太守杜玄起遂寧太守馮遷聞涪城不守並委郡出奔蜀土僑舊翕然並反道濟惶懼乃免吳兵三十六營以為平民分立宋興宋寧二郡又招集商賈及免道俗奴僮東西勝兵可有四千人賊衆數萬屯城西及城北道濟嬰城自守趙廣本以謫詐聚兵頓兵城下不見飛龍各欲分散廣懼乃將三千人

及羽儀詐其衆云迎飛龍至陽泉寺中謂道人程道養  
曰但自言是飛龍則坐享富貴若不從即日便斬頭道  
養惶怖許諾道養抱罕人也廣改名為龍興號為蜀王  
車騎大將軍益梁二州牧建號泰始元年備置百官以  
道養弟道昉為驃騎將軍長沙王鎮涪城廣自號鎮軍  
帛氏奴征虜將軍梁顯鎮北將軍同黨大帥張寧秦州  
刺史嚴遐前將軍奉道養還成都衆十餘萬四面圍城  
就道濟索費謙張熙曰但送此人來我等自不復作賊

道濟遣中兵參軍裴方明任浪之各將千餘人出西門戰皆失利十一月方明等復出戰破賊營焚其積聚賊黨江陽人楊孟子領千餘人屯城南道濟參軍梁雋之統南樓屢與孟子交言因投書曉以禍福要使入城孟子許諾入見道濟道濟大喜即板為主簿遣子為任克期討賊趙廣知其謀孟子懼將所領奔晉原晉原太守文仲興捨合得一千餘人與孟子并力自固廣遣同黨袁亥子攻晉原為仲興所殺廣又遣帛氏奴攻之連戰

仲興軍敗及孟子並死方明復出東門破賊三營斬首  
數百級賊雖敗已復還合方明復僞出北門仍回軍擊  
城東大營殺千餘人斬僞僕射蔡滔時天大霧方明等  
復揚聲出東門而潛自北門出攻城北城西諸營賊衆  
大潰於是奔散道養收合得七千人還廣漢趙廣以別  
卒五千餘人還涪城初別駕張熙說道濟令糴太倉穀  
賊以九月末圍城至十二月末廩米便盡方明將二十  
人出城求食為賊所敗匹馬獨還賊因追之衆復大集

方明夜於城西繩上道濟為設食餧不能食唯泣涕而已道濟時有疾已篤自力慰勉之曰卿非大丈夫小敗何苦賊勢既衰臺兵垂至但令卿還何憂於賊即減左右數十人配之賊城外云方明已死可來取喪城中大恐道濟夜列炬火方明自出衆見之乃安道濟悉出財物於北射堂令方明募人時城中或傳道濟已亡莫有至者梁雋之說道濟曰將軍氣息綿綿而外論互有同異今軍師屢敗妖寇未殄若一旦不虞則危禍立至宜

稱小損聽左右給使斃出不然敗矣道濟從之即喚左右三十餘人告之曰吾疾久汝等扶侍疲勞今既小損各聽歸家休息喚復還給使既出其父兄皆問使君亡來幾日子弟皆言君漸差誰言亡者傳相告語城內乃安由是應募者一日千餘人十年正月賊衆大至攻逼成都道濟卒梁僞之與方明等及其故舊門生數人共埋尸於後齋使書與道濟相似者為教命酬答籤疏不異常日故雖母妻不知也二月道養於毀金橋升壇郊

天方就柴燎方明將三千人出擊之賊列陣營前死戰  
日夕乃大敗臨陣斬偽征虜將軍趙石之等八百餘級  
道養等退保廣漢是月平西將軍臨川王義慶以揚武  
將軍巴東太守周籍之即本號督巴西梓潼宕渠遂寧  
巴郡五郡諸軍事巴西梓潼二郡太守率平西參軍費  
淡龍驤將軍羅猛二千人援成都廣等屯據廣漢分守  
鄆川連營百數處處屯結籍之與方明及費淡等攻鄆  
冠之廣等退據郡城傍竹自固羅猛率隊主王吁等并

力追討張尋自涪城率衆二萬來助廣等方明淡斬竹  
開逕邀之戰敗退還鄖縣廣等又移營屯箭竿橋方明  
等破其六營乘勝追奔逕至廣漢廣等走還涪及五城  
四月十日發道濟喪五月方進軍向涪城張尋唐頻渡  
水拒戰方明擊破之生擒偽驃騎將軍雍秦二州刺史  
司馬龍仲斬之龍仲道助也州吏嚴道度斬嚴遐首廣  
等並奔散涪蜀皆平俄而張尋攻破陰平復與道養合  
帛氐奴攻廣漢費淡督將軍种松等與戰斬其梁州刺

史杜承等百餘級九月益州刺史甄法崇至成都誅費謙之道濟喪及方明等並東反道養等領二千餘家逃於郪山其餘羣賊亦各擁戶據竄出為寇盜不絕十三年六月太祖遣寧朔將軍蕭汪之統軍討之軍次郪口帛氐奴斬偽衛將軍司馬飛燕歸降汪之擊之破道養道養還入郪山十四年四月趙廣張尋梁顯各率部曲歸降偽輔國將軍王道恩斬道養送首餘黨悉平遷趙廣張尋等於京師十六年廣尋復與國山令司馬敬琳謀

反伏誅先是道濟振武司馬蜀郡太守任會之雖不任  
軍事事寧以為正貢郎裴方明虎賁中郎將仍為義慶  
平西中兵參軍龍驤將軍河東太守費淡太子屯騎校  
尉周籍之後為益州刺史粹族弟損字子騫衛將軍毅  
從父弟也父鎮之字仲德以毅貴歷顯位閑居京口未  
嘗應召常謂毅汝必破我家毅甚憚之每還京未嘗敢  
以羽儀入從入鎮之門左光祿大夫徵不就元嘉二年  
年九十餘卒於家損元嘉中歷職義興太守東土殘饑

太祖遣揚州治中沈演之東入賑卹以捐綏撫有方稱  
為良守官至吳郡太守追贈太常

史臣曰帝王受命自非以功靜亂以德濟民則其道莫  
由也自三代以來醇風稍薄成功濟務尊出權道雖復  
負扆南面比號軒犧莫不自謝王風率由霸德高祖崛  
起布衣非藉民譽義無曹公英傑之響又闖晉氏輔魏  
之基一旦驅鳥合不崇朝而制國命功雖有餘而德未  
足也是故王謐以內懼流奔王綏以外侮成釁若非樹

奇功於難立震大威於四海則不能成配天之業一異  
同之心義熙以後大功仍建自桓溫於斬所臨莫不獻  
珍受朔及金墉請吏元勲將舉九命之禮既行代終之  
符已及方復觀兵正謂用師天險獨克之舉振古難稱  
若使閉門反政寘兵散地後敗責其前功一眚虧其盛  
業豈復得以黃屋朱戶為袞晉之貞臣乎及其靈威薄  
震重關莫守故知英竿所苞先勝而後戰也王鎮惡推  
鋒直指前無彊陳為宋方叔壯矣哉

宋書卷四十五

宋書卷四十五考證

劉懷慎傳宋臺立召為五兵尚書仍督江北淮南諸軍  
前將軍南晉州刺史○

臣承蒼

按州郡志無南晉州

晉字疑誤

宋書卷四十五考證